


四庫全書

經部

欽定四庫全書

周易經傳集解家人睽卷十九

宋 林栗 撰



序卦曰夷者傷也傷於外者必反於家故受之以家人
家人為卦明夷之變也自明夷之家人下卦不動上

坤為巽變其五上二爻而成卦也坤順也巽巽也順之與巽无以相遠而成卦之才若是不同者取其爻象而名之也以六居五則无以應六二以六居上則无以制九三是以為明夷變其爻則尊卑內外莫不各當其位是以謂為家人也夷者傷也傷於外而反於家事之必至理之固然也易乃取以為序其意義安在夫以一人之尊而居億兆之上可謂崇高矣初登于天照于四國可謂聰明矣然乃夷其明而至於

亡何也天下之本在國國之本在家天下之所以入
於明夷者亂之所生未嘗不始於家也詩云亂匪降
自天生自婦人若夫傷而能悔悔而能反者必由家
齊而後國治國治而後天下可平故曰紂以妲己亡
周以任姒興書云牝雞無晨牝雞之晨惟家之索詩
云刑于寡妻至于兄弟以御于家邦此則傷於外必
反於家故受之以家人意也文中子書以明內齊外
言家人之象伊川程氏曰萬物至異而潔齊非異有

齊之義也易之取象皆如是矣何獨於巽而疑之然
明內齊外不足以發指其義伊川乃以外巽內明言
其象亦未為得夫外巽內明是猶明夷之義也家人
何取焉乃若孔子亦豈云爾哉曰女正位乎內男正
位乎外而家人之象粲然著矣由是言之不通乎變
未可與言易也

家人利女貞彖曰家人女正位乎內男正位乎外男女
正天地之大義也家人有嚴君焉父母之謂也父父子

子兄兄弟弟夫夫婦婦而家道正正家而天下定矣

下離上巽成卦曰家人者初為離二為坎三又為離
四為巽離明也離麗也巽巽也巽入也內明而外巽
內麗而外入所以為家人者不可得而見也巽長女
也離中女也二女同居所以為家人者不可得而見
也為其有坎離之象焉坎離男女也合而言之則夫
婦也重而言之則父母也總而言之則一家之人也
自五以下皆有離坎之象焉是以謂之家人也然則

既濟之不為家人何也曰既濟之終以六居上久而不知變則其道窮矣是故有濡首之象焉若夫家人以九終之譬言如人之一家內外皆有防閑始終不失其嚴然後家人之象成矣家人利女貞何謂也曰家人反復有巽離兌之象焉巽離兌三女也其在六爻為女者二四而已二四陰位也陰居之女之正也家人之道利在女正也女正則男正可知矣或曰何謂也曰男子生而有四方之志為君長則有治民之道

為臣下則有事上之宜其所謂正不止施於家人也
言女正知其家道正矣是故九五正位乎外六二正
位乎內男女各得其正矣五天位也二地位也天穹
隆而在上地磅礴而居下故子曰家人女正位乎內
男正位乎外男女正天地之大義也或曰然則九三
六四非男女之正與曰家人有夫婦之別焉有父子
之嚴焉有姑婦之順焉有兄弟之敬焉有娣姒之睦
焉由夫婦而言則五夫道也二婦道也內外之位正

也由父子而言則五為父四為子三為母二為婦上
下之分定也由兄弟而言則五兄也三弟也二四蓋
娣姒也長少之叙明也一家之象粲然備矣故子曰
家人有嚴君焉父母之謂也父父子子兄兄弟弟夫
夫婦婦而家道正正家而天下定矣程氏曰一家之
中不嚴則孝敬衰无君則法度廢故必有所尊嚴而
君長之者九五九三之謂矣或曰說者謂五為父四
為母若何曰非也自父母相配而言則是夫婦也二

位是已對子而言故稱父母九五為父教子以治乎
外九三為母詔婦以治乎內豈不坦然明白也哉若
以四言之則母失其嚴子失其順矣或曰母主乎愛
尚乎慈係之九三不已過乎曰諺不云乎慈母有敗
子嚴家无格虜昔之賢母以教子治家名聞後世者
豈惟慈愛而已乎子曰家人有嚴君焉父母之謂也
學者尚何疑焉

象曰風自火出家人君子以言有物而行有恒

火者離也風者巽也火性上炎威嚴之象也風體旁
行教化之象也火烈而風生焉家嚴而化行焉夫火
南方之物也心君之屬也人之所望而畏焉者也君
子觀此之象然後知身不可不正而家不可不嚴矣
言有物行有恒所以修身而齊家取風火之義也
雜卦曰家人內也

家人為卦以男女正位而成其在六爻以閨門之內
治為義何者初上二陽有門牆扞蔽之象二三四五

有室家男女之象焉是以謂之內也傳曰君義臣行
父慈子孝兄愛弟敬所謂六順也禮婦人送迎不出
門見兄弟不踰閭外言不入於梱內言不出於梱故
家人之象以初上二爻為內外終始之閑中間四爻
為少長尊卑之序初之悔亡上之終吉內外終始之
有其閑也二之无攸遂三之嚆嚆四之富家五之勿
恤而皆係之吉者長少尊卑之得其序也或曰然則
初九以陽居剛上九以陽居柔其所以防閑之道不

同何也上卦為外下卦為內上九者外之極宮之前也初九者內之極室之後也宮室之制前有門闕後有垣牆門闕所以司啟閉也故剛柔雜焉垣牆所以杜罅隙也峻為之閑嚴為之禁豈非防微謹始之義也哉

初九閑有家悔亡象曰閑有家志未變也

初九離也以陽居剛而在一卦之下應乎六四四坎巽也故曰閑有家閑闌也扞蔽之義也有家而无閑

不能有其家者也閑之者禮之謂乎所以扞蔽內外
不可窺窬者也家人之道外不踰閭內不踰梱故初
九不以應言取諸防閑以為義也故曰悔亡初應在
四是以有悔行之於始故得悔亡人之常情妻子之
間寵之而弗教縱之而弗禁其心以為愛之也馴習
浸淫陷於不義則長者之過也悔而圖之將无及矣
是故君子於其始而閑之則放僻邪侈无自而生悔
可亡也故子曰閑有家志未變也逮其志變習流然

後從而止之則用力多而不可勝制矣

六二无攸遂在中饋貞吉象曰六二之吉順以巽也

六二坎也以陰居柔而在下卦之中應乎九五之離
故曰无攸遂遂成也有所欲為而遂其志者也春秋
之義大夫无遂事而况婦人乎六二以陰居柔處於
下而得中位乎內而守正无所敢成者故曰在中饋
坎為酒離為食故有中饋之象在中而主饋食婦人
之職也禮曰精五飯幕酒漿詩曰無非無儀惟酒食

是議以貞斯為吉矣故曰貞吉子曰六二之吉順以
巽也其妾婦之道歟

九三家人嗃嗃悔厲吉婦子嘻嘻終吝象曰家人嗃嗃
未失也婦子嘻嘻失家節也

九三下體為離上體亦為離以陽居剛而在下卦之
上上无其應而介於二四之間二四皆坎也故曰家
人嗃嗃按陸氏音義嗃嗃荀作確確劉作煊煊嘻嘻
張作嬉嬉陸作喜喜愚以煊煊嘻嘻為是今韻嗃字

有兩音黑角切悅樂也黑各切嚴也並引家人嗃嗃
為證煇字有四音虛嬌切炎氣也呼木切熱也呼酷
切火熱也黑各切熾也煇是炎熾之貌四音皆同嗃
一曰說一曰嚴未詳厥二音皆本於此文之注蓋學
者相謬語當以煇煇為正煇炎也煇煇炎之極也離
為火故有炎煇之象以陽居剛上下皆離是以謂之
煇煇也鄭子產曰火烈人望而畏之故鮮死焉是火
有威嚴之象也家人之道尚嚴而戒瀆然九三重離

而不中至於煬煬亦云過矣故曰悔厲吉剛而不中
能无悔乎傷恩則離能无厲乎然與其有不可制之
漸不若有不可犯之嚴然則九三雖悔且厲而家道
无虧斯為吉慶故曰婦子嘻嘻終吝舊說以嘻嘻為
喜笑之貌考之爻象不應求之辭二音既贅且闕詩
云妻子好合如鼓瑟琴宜爾室家樂爾妻孥然閨門
和樂發於喜笑非聖人之所禁也王氏謂嘻嘻歎之
聲按詩噫嘻禮記嘻其甚也皆歎辭也六二為婦六

四為子二四皆坎也坎為加憂故有嘻嘻愁歎之象
九三居子婦之間處門內之長母之象也稟陽剛之
才體重離之象其威赫然望而可畏雖過乎剛猶未
為失若苛虐已甚而察見淵魚將使之无所措手
足而有愁歎之聲以此終之不亦吝乎三下卦之極
也故有終吝之戒焉子曰家人煊煊未失也婦子嘻
嘻失家節也苦節不可貞其是謂乎

六四富家大吉象曰富家大吉順在位也

六四下體為坎上體為巽以陰居柔而在上卦之下
應乎初九而介於九三九五之間三爻皆離也故曰
富家大吉家人六四與六二之義同九五與九三之
義同六二九三既明剛柔之得其道矣故於六四九
五互言其所未及而推廣有家之道也坎為勞卦巽
為近利市三倍故有富家之象陽為富陰為貧陽為
實陰為虛六四以陰居柔而謂之富家何也曰四子
道也為人子者无私貨无私蓄不敢私假不敢私與

六四居父母之間所應所比莫非富貴而已獨虛貧是不富其身而富其家者也家富而子貧未之有也身任其勞家享其利謂之大吉不亦宜乎故子曰富家大吉順在位也六四於家為子於國為臣為人子者无以有已為人臣者无以有已其斯以為順乎九五王假有家勿恤吉象曰王假有家交相愛也

九五離也以陽居剛而在上卦之中應乎六二而乘乎六四二爻皆坎也故曰王假有家九五剛明中正

下應六二離坎相配家人之極致也然初九九三既備其義矣故於九五天位之爻推廣有家之道也假大也王大有家者非至常人之家也乃以天下為家者也孝經曰閨門之內具禮矣乎嚴父嚴兄妻子臣妾猶百姓徒役也然則古之聖人推一家之治以及乎天下如斯而已矣故曰勿恤吉書云我受命無疆惟休亦無疆惟恤恤憂也勿者慎之辭也坎為加憂故有勿恤之象天下之治本於一家孝於其親則天

下之為人子者莫敢不孝敬事其長則天下之為人
弟者莫敢不順刑于寡妻則天下之為人夫者莫敢
不義字于厥子則天下之為人父者莫敢不慈差之
毫釐則繆以千里其可以勿恤乎詩云母念爾祖聿
修厥德與此同意王之恤民如其赤子則民之愛王
如其父母斯為吉矣故子曰王假有家交相愛也
上九有孚威如終吉象曰威如之吉反身之謂也

上九兌也以陽居柔而在一卦之上下无其應而乘

乎九五之離故曰有孚威如也家人六爻自五以下陽貞乎剛陰貞乎柔陽體乎離陰體乎坎離為威坎為信惟上九一爻剛柔相濟而體乎兌兌說也家人心說而誠服者也是以兼乎威信而言之威无信則不立信无威則不行家人之終别无他義惟威與信不可偏廢不可暫弛故曰終吉以此終之斯為吉矣而夫子則釋之曰威如之吉反身之謂也孟子曰身不行道不行於妻子古之人所以能齊其家者言有

物而行有恒也聖人懼世俗不察直以威嚴為治家之道而不能正身以率之則父子有相夷之惡夫婦有反目之釁兄弟有鬩牆之醜何威之能行哉惟君子反求諸已視聽言動非禮不為斯有不言而信不怒而威者矣豈徒剛猛嚴厲而已哉此與大有六五厥孚交如威如吉同義易而无備所以為大有之威反身而誠所以為家人之威也

離坎離兌

兌下

離上
睽

睽
睽
睽

序卦曰家道窮必乖故受之以睽睽者乖也

睽之成卦家人之反也自家人之睽離反居上巽變
為兌上下相易而成卦也離火也巽木也兌澤也木
之於火有相生之義離體居下有炎上之情是以為
家人也火之於澤有相畏之資離上兌下无相與之

意是以為睽也剛柔上下各當其位是以為家人也
反則易位是以為睽也睽有兩義有自然之睽有不
合之睽二女同居其志不同行此自然之睽家道窮
必乖此不和之睽也或曰家道窮必乖何謂也曰家
人之道以嚴為上如上九之嚴則終乎吉如九三之
嚴則終乎吝極炎上之性而无逮下之情其致乖也
不亦宜乎

睽小事吉彖曰睽火動而上澤動而下二女同居其志

不同行說而麗乎明柔進而上行得中而應乎剛是以
小事吉天地睽而其事同也男女睽而其志通也萬物
睽而其事類也睽之時用大矣哉

下兌上離成卦曰睽者初為兌二為離三為坎四又
為離離火也兌澤也火動而上澤動而下則不交而
否矣為其有離坎之象焉是以不謂之否而謂之睽
也兌少女也離中女也二女同居其志不同行則不
和而訟矣為其有離坎之象焉是以不為訟而為睽

也睽者乖也始乖而終合是以謂之睽也夫離坎者
既濟之象也始乎睽終乎既濟則睽之義也睽小事
吉何謂也曰書不云乎汝則從龜從筮從卿士從庶
民逆吉汝則從龜從筮從卿士逆庶民逆作內吉作
外凶龜筮共違于人用靜吉用作凶夫興天下之大
事建天下之大業是必天人和同上下丕應而後可
所謂朕志先定詢謀僉同鬼神其依龜筮協從是也
至於興一利除一害凡所施為措注必上下叶同不

幾乎惟予言而莫予違者乎事有利害計有得失兼
天下之謀合天下之慮徃徃睽而不同是故人主慎
所擇焉故曰小事吉也子曰睽火動而上澤動而下
二女同居其志不同行說而麗乎明柔進而上行得
中而應乎剛是以小事吉夫說而麗明柔而上行中
而應剛斯謂之合矣而何睽之云乎曰天地之間有
合必有離有聚必有散睽本生於同而同蓋出於睽
不同則无睽不睽則无同今夫離火兌澤同賦形於

天地中女少女同鞠育於閨門其始未嘗不同也火性炎上澤性潤下中女麗坎少女配艮其後未嘗不睽也睽之為義蓋取諸此然即其卦而求之則說而麗明柔而上行得中而應乎剛此則要其歸同歟異歟故曰天地睽而其志同也男女睽而其志通也萬物睽而其事類也睽之時用大矣哉天地之形雖分而生成之事則同男女之體雖異而室家之志則通萬物之品雖殊而孕育之事則類自其同以求其睽

則火澤相近而異趣二女同居而異行是睽也即其
睽以求其同則天地至于萬物雖形分體異品類散
殊要其歸未始不同也是故睽之六爻皆始乖而終
合然則明目達聰并謀兼智百官殊職萬民異業刑
德並施文武咸用同歸于治者睽之義也顏淵季路
共出孔門周公召伯夾輔王室夫豈必盡同耶夫惟
聖人為能收天下之睽以成天下之用睽之時用斯
為大矣繫辭曰弦木為弧剡木為矢弧矢之利以威

天下蓋取諸睽何也。弧矢之作，睽全材以成器，合衆睽以為用，則睽之象著矣。離為戈兵，兌為毀折，坎為矯揉，故有弧矢之象焉。

象曰：上火下澤，睽君子以同而異。

上火下澤，睽之象也。君子以同而異者，論語云：君子而不同，周而不比，羣而不黨，皆其義也。或曰：既云和而不同，又曰同何也？以和與同言之，則同為小人和，而不同又曰同何也？以和與同言之，則同為小人以同而異言之，則同為君子。或曰：子夏傳云：同其事。

而異其羣何謂也曰夫言豈一端而已哉言各有當
也臨川王氏云同其道而異其事二者孰得曰无害
也道同而事異者君子之與君子也事同而道異者
君子之與小人也以文害辭以辭害意者難與言經
矣

雜卦曰睽外也

睽之為卦以始乖終合而成其在六爻以內外相應
為義然家人謂之內睽謂之外者家人二女也女正

位乎內者成家之義故係之長女也睽亦二女也女
志在乎外者從人之義故係之少女也然方睽之初
上下乖隔陽務上行陰務下趨陽上行而弗得其配
陰下趨而弗遇其主困而後反反而後遇故九四上
九皆為睽孤六三掣曳而无初也上行下趨雖有隔
闕不旋其踵而得之者初九六五皆為悔亡九二遇
主而无咎也睽之為外斯其旨歟

初九悔亡喪馬勿逐自復見惡人无咎象曰見惡人以

辟咎也

初九兌也以陽居剛而在下卦之下上无其應而九
四之離適當其位故曰悔亡離為火兌為澤此象所
謂上火下澤者然初九之澤居於下下流而百谷之
所鍾也四雖上行而二五三之各從其配四无所與
然後復歸于初初則受而納之是以謂之悔亡也故
喪馬勿逐自復離為火馬火畜也陽物也是故九四
之離有馬象馬以九居初不應於四有喪馬勿逐之

象馬九四上行爲離反下亦爲離進无所遇窮於上者必反於下故有自復之象焉喪失也易言喪牛者喪其順也喪羊者喪其狠也喪馬者喪其健也初九之有九四可謂健矣而介於六三六五之間宜其逸而不可禁也然方睽之時物情乖異九四雖欲從於三五而不免按劍之疑五自應二三自應上四无所歸其勢自復雖勿逐可也逐則遂喪之矣故曰見惡人无咎忠臣不事二君貞女不事二夫今也背五而

逃惟利是視行无所納冒耻而歸可謂惡人也然方
睽之時臣主未定或離或合或叛或從苟以為愆何
者非罪喪而逐之是使之不敢復也復而不納是使
之无所容也惡人无所容君子豈久安之道哉昔之
有大度者惟能寬容博愛含垢納汙來者勿拒去者
勿追然後天下狙詐咸作吾使又何咎之有哉若不
忘舊惡皆雙言敵也故子曰見惡人以辟咎也晉文公
歸國寺人披請見公使人讓之且辭焉對曰臣謂君

之入也其知之矣若猶未也又將及難行者甚衆豈
惟刑臣公見之以呂卻之難告里鳧須又請見公之
出也竊其藏以逃公辭焉以沐里鳧須謂僕人曰沐
則心覆心覆則圖反宜吾不得見也國君而讐匹夫
懼者衆矣僕人以告公遽見之漢高帝先雍齒之封
赦季布之罪推此類也豈非見惡人以辟咎乎哉

九二遇主于巷无咎象曰遇主于巷未失道也

九二離也以陽居柔而在下卦之中應乎六五之坎

故曰遇主于巷離為相見五在君位故有遇主之象
夫陽升而陰降者也離炎上而坎下流也九二六五
得中而相與者也其後之必矣然方睽之時介於六
三九四之間五欲從二而四闕其路二欲從五而三
阨其衝是以相遇于巷也巷者徑也遇者適相值也
相值于巷宜若鑽穴踰牆之類矣然其所遇者主也
不于塗而于巷者辟寇而相求也雖遇非其所豈為
失道哉故曰无咎而子曰遇主于巷未失道巷雖非

道可以通乎道矣楊子曰塗雖曲而通諸夏則由諸
九四之遇元夫上九之遇雨皆離象也

六三見輿曳其牛掣其人天且劓无初有終象曰見輿
曳位不當也无初有終遇剛也

六三上體為坎下體為巽以陰居剛而在下卦之上
應乎上九之離故曰見輿曳其牛掣其人天且劓天
當作而字之訛也安定胡氏曰漢法有罪髡其鬢髮
曰而今從之坎於馬為曳於輿為多眚於人為加憂

為刑傷巽為進退為不果於人為寡髮為廣顙故有
曳掣髡劓之象輿所以載也牛所以駕也人所以乘
之也不曰馬而曰牛者陰柔故也曳牽於後謂九二
也掣阻於前謂九四也而髡其首謂上九也劓刑其
面謂九四也六三不當其位而介於九二九四之間
是以有曳掣之患應於上九掣而不得進鄰於九四
噬而不肯從是以有髡劓之災也或曰上髡其首四
刑其面九二獨无傷耶曰九二應在六五難在六三

四方噬三則二以其間與五相遇其肯為三不利耶
然則其曳之何也曰三近於二不能自克故有牽曳
之象非二之挽而留之也或曰自二以上皆有離坎
之體焉知二之不從三而三之不從四乎曰方睽之
時人情乖疑雖得其主猶未必用雖遇其配猶未遽
合況非其主與其配乎是以知其不從也故曰无初
有終輿曳而牛掣首髡而鼻割可謂无初矣九四噬
三而不能合然後上九說弧而納之是之謂有終也

故子曰見輿曳位不當也无初有終遇剛也伊川程氏曰始為二陽所厄故无初睽極則有終合之理故有終夫不正而合未有久而不離者也合以正道則无終睽之理故賢者順理而安行智者知幾而固守九四睽孤遇元夫交孚厲无咎象曰交孚无咎志行也九四上體為離下體亦為離以陽居柔而在上卦之下下无其應故曰睽孤睽乖也孤獨也九四下无其應上行而无所遇介於六三六五之間二爻皆莫之

與乖而又獨是以謂之睽孤六三介於二四而謂之
制孚曳九四介於三五而但曰睽孤者三陰而四陽三
坎而四離也九四一爻上下皆離窮於上必反於下
五既應二三又從上四无所與必復于初故曰遇元
夫交孚元善之長也以九居初於四為配是以謂之
元夫也初陽也四亦陽也以陽遇陽其謂之元夫何
也陽為行陰為止若二陰居相應之位各止其所決
无相從之義今上下皆陽各有行健之志虽无感應

相與之情而有同氣相求之理及其睽孤不約而合
是以謂之交孚也故曰厲无咎而子曰交孚无咎志
行也孟子言伊尹五就湯五就桀雖未必然然去桀
而歸湯則有之咸有一德斯之謂與

六五悔亡厥宗噬膚往何咎象曰厥宗噬膚往有慶也
六五坎也以陰居剛而在上卦之中應乎九二之離
故曰悔亡陽升而陰降離上行而坎下趨是以係之
悔亡也當睽之時間於三四是以有悔得中而應始

乖而終合是以悔亡也故曰厥宗噬膚往何咎宗同體也謂九四也膚柔物謂六三也離為食坎為堅巽為柔故有厥宗噬膚之象六三有應在上九四扼而取之如噬膚而難噬也五以其間往從九二斯遇之矣又何咎之有哉故子曰厥宗噬膚往有慶也陰陽相獲斯為慶也或曰同人二五不猶之睽乎同人之二曰同人于宗吝其五曰大師克遇而睽之五曰厥宗噬膚往何咎其二曰遇主于巷无咎何其得失難

易之殊也曰同人與人同者也是以相遇於大師也
睽者與人異者也是以不遇諸塗而遇諸巷也凡易
之辭豈苟云乎哉

上九睽孤見豕負塗載鬼一車先張之弧後說之弧匪
寇婚媾往遇雨則吉象曰遇雨之吉群疑亡也

上九離也以陽居柔而在上卦之上應乎六三三坎
巽也故曰睽孤陽升而陰降離上行而坎下趨又有
巽入之象焉居卦之終亢而无與是以睽而又孤也

故曰見豕負塗載鬼一車先張之弧後說之弧離為見坎為豕為陷故有負塗之象為幽為輿故有載鬼之象離為戈兵故有張弧之象始睽而終合故有後說之象離也者明也其在上九則炎上之極也傷於亢而過於猜者也當睽之時物情乖異六三自奮於掣曳之中下无所與反而從上上九猶以猜疑之意逆而拒之故見豕負塗污穢之甚也見車載鬼異類之甚也是以張弧而射之然睽極必通疑久必解窮

於上必反於下故五既遇二四既遇初六三之情不
辨而彰然後上九說其孤而納之三坎也上離也方
其睽也未濟之象也及其合也既濟之象也故曰匪
寇婚媾往遇雨則吉坎為盜故有寇象其配在離故
有婚媾之象陰陽交際故有遇雨之象夫逆而拒之
則見其為豕怪其為鬼疑其為寇近而叅之則知其
非寇乃婚媾也往而遇之斯為吉矣故子曰遇雨之
吉群疑亡也方其疑之也為豕為鬼為寇無所不至


矣及其遇之也為婚媾為雲雨皆坎象也非前後之
有殊疑信異而美惡變矣君臣之間夫婦之際可不
察與或曰六三有坎巽之體而象其物宜有坎无巽
何也曰坎上體也巽下體也初辭擬之卒成之終至
於上九反而從其配矣有坎而无巽不亦宜乎

周易經傳集解卷十九

欽定四庫全書

周易經傳集解蹇解卷二十

宋 林栗 撰



序卦曰睽者乖也乖必有難故受之以蹇蹇者難也

蹇之成卦睽之變也自睽之蹇兌變為艮離變為坎

六爻盡變而成也兌西方也離南方也艮東北也坎
北方也西南者陰之所聚而東北者陽之所居也離
兌二女睽於西南而適於東北離欲從坎兌欲從艮
西南既喪其朋矣東北則未之達焉離之從坎也由
西則睽乎兌由東則睽乎艮兌之從艮也由南則睽
乎離由北則睽乎坎艮止也坎陷也遇艮則止遇坎
則陷是以為蹇難之象也離為火兌為澤艮為山坎
為水火澤相違是以謂之睽也山水連亘是以謂之

蹇也蹇蹇也行不進之貌也前有險陷後有峻阻欲
无蹇得乎所以然者與物睽乖故也與物睽乖則不
得其平而由於險矣故夫二女相得而无乖則離由
西以從坎兌由南以從艮尚何蹇難之有哉乖必有
難受之以蹇斯其義矣

蹇利西南不利東北利見大人貞吉象曰蹇難也險在
前也見險而能止知矣哉蹇利西南往得中也不利東
北其道窮也利見大人往有功也當位貞吉以正邦也

蹇之時用大矣哉

下艮上坎成卦曰蹇者初為艮二為坎三為離四又為坎艮止也坎陷也止者不能以自行也陷者不能以自振也然猶曰蹇云者謂其中有離象焉坎陷也離麗也一陷焉一麗焉夫是以謂之蹇也艮為山為徑路為小石坎為水為溝瀆為隱伏皆險難之象也謂其有離象焉離為目為火為日為電是以見險而能止也故子曰蹇難也險在前也見險而能止知矣

哉蹇利西南不利東北何謂也曰西者兌也南者離也西南者坤也東者震也北者坎也東北者艮也震動也艮止也坎陷也離明也兌說也坤順也是故東北者險難之所而西南者无難之地也蹇之二陽皆體乎離而九三則體乎震者也夫解雜亂紛糾者見史記孫武子傳不控捲救閑者不搏擻蹇難之時群動洶洶而九三又以決躁行之是以難救難猶治絲而棼之也惟九五之離得中動則應之所謂聖人作

而萬物覩者也天下皆動則靜者勝天下皆爭則讓者勝蹇難之時有聖人者出而靖之必先立於无難之地以受天下之歸然後可以紓天下之難若難之所在我亦在焉則自謀之不暇而何以靖人乎子曰居其所而衆星拱之孟子曰不嗜殺人者能一之老子曰夫惟不爭故天下莫能與之爭詩云帝謂文王無然畔援無然歆羨誕先登于岸利西南不利東北其迨窮也九五上卦之中九三下卦之窮也利見大人

貞吉何謂也曰九五之謂大人也離為日故有利見之象當位故有貞吉之象貞者正也所貴乎大人者正已而物正之也故九五正則六二正六二正則六四上六利見大人者莫不正矣貞猶止也蹇難未平止而待之斯為吉矣故曰利見大人往有功也當位貞吉以正邦也或曰然則夫子又言往得中往有功何謂也曰靜者不忘於動也止者不忘於行也尺蠖之屈以求信也龍蛇之蟄以存身也見險而止得中

而往止則為智往則為功也故曰蹇之時用大矣哉
或曰吾子不以當位為貞而此言當位貞吉何謂也
曰貞者正也以此為正者也故有以當位為貞者有
以不當位為貞者視其時義如何耳天尊地卑以當
位為貞也天地變化以不當其位為貞也故子曰天
下之動貞夫一者也當蹇之時以靜制動而可以不
當其位為貞也哉蹇之時用斯為大矣

象曰山上有水蹇君子以反身修德

山者艮也水者坎也山下出泉蒙之象也山上有水
水之蹇也水在山上而謂之蹇何也曰水之為功也
以行舟楫而濟不通也以溉禾黍而成豐年也今為
物所礙不得行而止於山上无及物之功是以謂之
蹇也然水蓄於山為山之潤雖曰蹇難庸何損乎是
故君子行有不得則反求諸已內省不疚而自信不
回不以陋巷簞瓢而改其樂也子曰良農能稼而不
能為穡良工能巧而不能為順君子能修其道綱而紀

之經而理之而不能為容此反身修德之謂也

雜卦曰蹇難也

蹇之成卦以山水連亘而成其在六爻以聖賢遭難為義何者蹇之為言行不進也山既峻阻水又險陷其為蹇難宜矣不勝其欲速之情冒險而進則陷溺之道也君子居易以俟命小人行險以徼倖是故蹇之諸爻皆以往為蹇來為利往者屈也以我求人者也來者信也人之求我者也蹇之成卦四陰二陽陽

者四陰之所求而四陰者二陽之所求也以我求人
實難人之求我又何難之有哉西南之利東北之不
利於此斷矣東北難之所在而西南者无難之地也
蹇惟九五體離離為南方之卦大中至正而自立於
无難之地以受天下之歸其餘五爻皆有震坎艮之
象焉震坎艮者東北之卦也是故初六往蹇而來譽
九三往蹇而來反六四往蹇而來連上六往蹇而來
碩惟六二蹇蹇而无往來之辭也人臣之義不得不

然匪其身之故也蹇之為難不其然乎

初六往蹇來譽象曰往蹇來譽宜待也

初六艮也以陰居剛而在下卦之下上无其應而承六二之坎故曰往蹇來譽坎北也艮東北也難之所在也以是而往宜其蹇矣然艮有止之象焉靜以待其求斯為譽矣居一卦之卑處衆人之下居易以俟命見險而能止知幾之君子也其致譽不亦宜乎故子曰往蹇來譽宜待也子貢問曰有美玉於斯韞匱

而藏諸求善價而沽諸子曰沽之哉我待價者也其初六之謂與

六二王臣蹇蹇匪躬之故象曰王臣蹇蹇終无尤也

六二坎也以陰居柔而在下卦之中應乎九五而承於九三二爻皆離而三又震也故曰王臣蹇蹇五在天位故有王象二在地位中正而應故有王臣之象蹇難也蹇蹇者難之甚也二應五而關於三是以謂之蹇蹇也諸爻皆言往蹇六二獨言蹇蹇何也彼皆

遇險而止是以有往來之辭二上應五離坎相配是以蹇蹇而不休也故曰匪躬之故夫六二之中正柔順豈行險以僥倖者乎人臣之義東西南北惟命之從匪其身之故也雖知險難在前勢有不得避若志在於利其身而冒險不顧欲无咎得乎哉故子曰王臣蹇蹇終无尤也語曰事君能致其身記曰臨難毋苟免六二之謂矣

九三往蹇來反象曰往蹇來反內喜之也

九三上體為坎下體為震以陽居剛而在下卦之上
應于上六而介於二四之間三爻皆坎也故曰往蹇
來反震動也坎陷也皆東北也以是而往宜蹇也二
五之配也四與上五之鄰也三往而求欲无蹇得乎
然三體乎離離南方也知東北之窮西南之利必將
反於无難之地矣九五大人也公天下以為心而不
私其利也來而得反不亦宜乎故子曰往蹇來反內
喜之也反之言復也喜之之辭也夫冒險而行者往

而不得進則退而無所歸今九三往蹇而猶不失上
六之應故內喜之也說者皆以六二當之夫二之所
為蹇蹇者三為之難也王臣之義猶匪其窮而喜於
九三之反何哉故曰內者三自謂也

六四往蹇來連象曰往蹇來連當位實也

六四上體為坎下體亦為坎以陰居柔而在上卦之
下下无其應而連於三五之離故曰往蹇來連坎北
方也又无其應是以往蹇剛柔相濟是以來連故子

曰往蹇來連當位實也陽為實以陽居剛故曰當位
九五九三之謂矣往者屈也來者信也以人求我則
利以我求人則難也或曰諸爻剛柔皆以往為蹇來
為利苟皆不往孰為來哉曰日往則月來月往則日
來日月相推而明生焉寒往則暑來暑往則寒來寒
暑相推而歲成焉未有往而不來者也未有來而不
往者也所惡夫往謂其犯難而往者耳聞文王作興
曰盍歸乎來九五之所謂朋來也後我后后来其蘇

六四之所謂來連也夫豈頑然不動而物自來乎

九五大蹇朋來象曰大蹇朋來以中節也

九五離也以陽居剛而在上卦之中應乎六二而介於四上之間三爻皆坎也故曰大蹇朋來大者陽也朋者衆也剛健中正而立於險難之中是大人之蹇也離也者明也萬物皆相見之卦也六二遠而應之六四上六近而附之是以謂之朋來也詩云自西自東自南自北無思不服九五之謂也故子曰大蹇朋來

以中節也夫惟中道而立往者不追來者不拒故能
措身於无難之地天下之不中者莫不於此而取節
焉夫是以朋來也


上六往蹇來碩吉利見大人象曰往蹇來碩志在内也
利見大人以從貴也

上六坎也以陰居柔而在上卦之上應乎九三而乘
九五二爻皆離而三又震也故曰往蹇來碩吉碩大
也上蹇之終宜若无難矣然猶曰往蹇云者未離乎

東北也應乎三而闕於五是以謂之蹇也比其來也水火相逮有既濟之象焉夫是以謂之來碩也故曰吉又曰利見大人大人九五也上志應三而利於見五何也曰五在西南无難之地也上不見五則无以達於三五既濟之於蹇而不享其利使上六九三得以相配五之所以為大人也故子曰往蹇來碩志在内也利見大人以從貴也内者三也貴者五也或曰陽為貴陰為賤焉知其不為三而為五乎曰以陰視

陽則陽貴而陰賤以三視五則五貴而三賤繫辭曰
三五同功而異位三多凶五多功貴賤之等也九五
在上而三為貴乎諸爻惟上六言吉者蹇至是而後
通斯為吉矣

震坎離坎



序卦曰蹇難也物不可以終難故受之以解解者緩也
解之成卦蹇之反也自蹇之解坎反居下艮變為震
二五相易而成也所以為蹇為解者二陽陷於四陰
之中也艮止也坎險也震動也遇險而止止在險中是

以為蹇也出險而動動在險外是以為解也艮為山
坎為水震為雷坎為雨水在山上不能以及物是以
為蹇也升而為雲降而為雨然後草木昭蘇昆虫咸
若是以謂之解也解之名卦不獨因蹇而成蓋亦因
屯而得之屯坎震也解震坎也坎之氣在山為泉在
川為水在天為雲在地為雨雷雨之動滿盈而為屯
及其沛然也斯為解矣物不可以終難受之以解此
其義歟

解利西南无所往其来復吉有攸往夙吉彖曰解險以動動而免乎險解利西南往得衆也其来復吉乃得中也有攸往夙吉往有功也天地解而雷雨作而百菓草木皆甲拆解之時大矣哉

下坎上震成卦曰解者初為坎二為離三又為坎四為震解之言緩也難紓而未平也詩云民亦勞止訖可小康解之謂也坎險也震動也出險而動動在險外宜若无難矣然猶曰解云者為其中有離象焉坎

陷也離麗也一麗一陷未離乎險是以謂之解也然
陷麗之象同一為蹇一為解者則震艮之反復而坎
之前後也震東方也坎北方也皆難之所在也謂其
有離象焉離明也萬物皆相見南方之卦也夫是以
謂之解也故子曰解險以動動而免乎險解解利西
南无所往其來復吉有攸往夙吉何謂也曰難在東
北則西南者无難之地也解之二陽皆體乎離而九
四則體乎震者也解之九四即蹇之九三也解之九

二即蹇之九五也蹇之成卦止乎險中是以利西南不利東北解之成卦出險以動是以但言西南之利而不言東北之不利也蹇利西南謂九五也解利西南謂九四也不利東北謂九三也其來復吉謂九二也九五居外卦之中故曰蹇利西南往得中也九三居內卦之終故曰不利東北其道窮也九四居外卦之初而體乎震得以貴下賤之義故曰解利西南往得衆也九二居內卦之中而體乎離得剛中不過之

義故曰其來復吉乃得中也利見大人者申言蹇利西南之爻也九五之謂大人也有攸往夙吉者申言解利西南之爻也九四之謂夙也故均曰往有功也大抵當蹇之時見可而進知難而退所謂得中而往道窮而止者也及解之時見幾而作不可不夙險難既平不可不復所謂往則得衆來則得中者也夫子既釋彖辭又敷暢其義解伯坎而出震於方為東於時為春於象為雷雨春者萬物舒緩之時雷雨者萬

物之所以舒緩者也故曰天地解而雷雨作雷雨作而百菓草木皆甲拆解之時大矣哉天下禍亂有聖人者出而治之其威如雷霆其澤如雨露民居塗炭之中使有更生之意豈不猶百菓草木甲拆之象乎解之時義斯為大矣

象曰雷雨作解君子以赦過宥罪

雷者震也雨者坎也雷行雨施解之象也君子以赦過宥罪者法解緩之義也今夫雷雨之象是威德並

行之譬也而獨言赦宥則刑戮之事不議而彰矣聖
人以為平難之時刑人殺人出於一時之權非能折
獄而致刑明罰而勅法不可以訓後世故但言赦宥
而已由是觀之古之赦宥大抵皆承禍亂之餘蕩滌
舊染與民更始如雷行而雨隨之民不怨雷霆之暴
而喜於膏澤之流也漢祖入秦約法三章大赦天下
得其義矣後世因之常歲赦宥以幸小人而以為合
於經義豈不過哉

雜卦曰解緩也

解之為卦以雷雨解緩而成其在諸爻以君子緩民
為義漢龔遂有言治亂民猶治亂絲不可急也唯緩
之而後可治何則上失其道民散已久難解之後豈
能以一朝而革之哉張其綱紀敷其教化優柔寬緩
日漸月漬使之遷善遠罪而不自知是君子緩民之
道也蹇解諸爻本相因而為義聖人互發其旨將使
學者深求而得之在蹇之時剛柔皆蹇故但言處蹇

之道不利東北而利於西南至解之時剛柔皆解故
以二陽為君子四陰為小人言君子之所以治小人
可緩而不可急也是故九二黃矢而貞吉九四先解
而後拇君子所以緩之道初六交際而无咎六五有孚
而自退六三致寇而誰咎上六獲之而无不利小人
之所以緩而不敢有爭心也解之為緩斯其旨矣
初六无咎象曰剛柔之際義无咎也

初六坎也以陰居柔而在一卦之下應乎九四而承

於九二二爻皆離而四又震也故曰无咎解之初六
即蹇之上六也其在於蹇利見大人矣而況於解乎
蹇利西南而不利東北上之應兼乎離震故有往蹇
之辭解利西南而无東北之不利則初六之所承與
其所應皆為无咎矣乃蹇之二陽一為得中一為道
窮者為其蹇而不相得也解之二陽一為攸往一為
來復二者相濟如出一人者謂其解而不相悖也初
六當難解之初居最下之地致恭盡禮以接二陽蹇

難之解與有力焉又何咎之有哉子曰剛柔之際義
无咎也後三陰者皆據高位而乘剛者也其能免於
咎乎亦猶剝之諸陰皆為有凶而六三猶言剝之无
咎也解之六三曰負且乘致寇至夫豈惡其負哉惡
其乘也由是言之初六之无咎明矣聖人之言簡而
當也如此

九二田獲三狐得黃矢貞吉象曰九二貞吉得中道也
九二離也以陽居柔而在下卦之中應乎六五而介

於初三之間三爻皆坎也故曰田獲三狐得黃矢離
為弓矢為田漁坎為狐故有田獲之象九二剛中故
有黃矢之象黃中色也矢直物也君子之譬也狐陰
類也其為性隱伏喜妖而善魅者小人之譬也解之
九二即蹇之九五也是解難之主也然居內卦之中
則所謂其來復吉者君子之平難也治其姦邪而信
其剛直得中而已不可過也過則有獸窮之慮矣故
子曰貞吉九二一田而三獲得其黃矢以此為貞斯

為吉矣何則解有四陰既獲其三懼其乘勝而前知得而不知喪故戒之云爾蓋公為曹參言治道曰治道去泰甚者耳其九二之謂乎故子曰九二貞吉得中道也

六三負且乘致寇至貞吝象曰負且乘亦可醜也自我致戎又誰咎也

六三下體為坎上體亦為坎以陰居剛而在下卦之上上无其應而介於二四之間二爻皆離而四又震

也故曰負且乘負者小人之事也乘者君子之器也
離為君子坎為小人陽為君子陰為小人以六居三
小人而在高位負且乘之象也九四在上故三為負
九二在下故三為乘以三而負四則以位而慢其上
也以三而乘二則以勢而暴其下也小人而乘君子
之器慢其上而暴其下則致寇之道也故曰致寇至
今夫小民之家無故得財而為暴慢之行則不旋踵
而盜至矣况夫居高位而食厚祿又以暴慢行之乎

故子曰慢藏誨盜冶容誨淫此之謂也寇者誰也謂六三也三既為負乘又自為寇何也曰坎為小人又為寇盜三有重坎之象是以既為負乘而又為寇也彼皆陰柔小人相與群居无信不能不相詐无禮不能不相瀆見其慢藏是以有穿窬之心說者乃以九二九四當之則失之遠矣寇盜者小人之所羞為也而謂君子為之乎夫謂非其有而取之者盜也以負而乘斯謂之盜矣而又重坎焉是故有躡其後而取

之者也故曰貞吝以此為貞羞吝宜矣子曰負且乘亦可醜也自我致戎又誰咎也明寇盜之象不在他爻矣

九四解而拇朋至斯孚象曰解而拇未當位也

九四下體為離上體為震以陽居柔而在上卦之下應乎初六而介於三五之間三爻皆坎也故曰解而拇拇足大指也足動而拇先焉故易凡言拇者動之速也解者緩也解而拇者先緩而後速也離南方故

為緩震東方故為速四居外卦之初先離而後震解而拇之象也孔子曰無欲速無見小利欲速則不達見小利則大事不成將欲速之必固緩之解之道也解有四陰二陽或以遠而應或以近而比惟初六一爻之於上六勢不相及三狐既獲又何往乎九二之於上六勢不相比難解而未平之象故曰无所往其來復吉九四之於上六則同體相連苟為不往則難无時而平矣故曰有攸往夙吉夙者速也投機之會

間不容髮先時者未至後時者无及使四安於解而
不志於動志於動而不務於速則是利西南而不往
有攸往而不夙也其能有濟乎故曰朋至斯孚朋者
衆也陰為朋初三五上是也孔子曰信而後勞其民
未信則以為厲已也成湯之信著於征葛文王之信
著於戡黎天下之人信其有救民之志而無害物之
心是以東面而征西夷怨南面而征北狄怨自西自
東自南自北無思不服也故書稱克寬克仁彰信兆

民詩稱儀刑文王萬邦作孚此象之所謂往得衆往有功者也故子曰解而拇未當位也夫難既解矣而猶不忘動者豈其喜功而好大生事以為樂乎為其以九居四未當其位故也進至於五位乎中正則利見而已尚何拇之云乎

六五君子維有解吉有孚于小人象曰君子有解小人退也

六五坎也以陰居剛而在上卦之中應於九二而乘

乎九四二爻皆離而四又震也故曰君子維有解吉
有孚于小人解者緩也孚者信也離為君子坎為小
人故也夫五者人君之位也以六居之而又坎焉是
陰柔小人之所附也小人而在君側可謂難去矣寬
之則其黨易散急之則其交必合懷之則革面而復
從疾之則含怨而致毒是以君子之治小人惟有維
之而已平其忿疾之心開其自新之路格則承之否
則威之優柔而勿迫哀矜而勿喜然後小人知君子

之不為已甚也亦莫不孚而自知退聽矣是故九四
言朋至斯孚六五言有孚于小人蓋相因之辭也漢
之竇武何進唐之李訓鄭注皆欲除君側之惡人卒
以不克而隕其身危其國者惟不能緩之而與之為
仇敵故也故子曰君子有解小人退也或曰六方居
五以何故而退乎曰九四震也六五坎也震下坎上
其卦為屯坎下震上其卦為解今也居解之時而震
在坎上不能久矣震為春坎為冬震為旦坎為夜日

出東方羣陰伏矣雖欲勿退其可得乎

上六公用射隼于高墉之上獲之无不利象曰公用射隼以解悖也

上六艮也以陰居柔而在上卦之上下无其應而乘六五之坎連於九四之震震又離也故曰公用射隼于高墉之上艮為黔喙之屬故有隼象又為土而在卦之最上故有高墉之象六五既退則九四遇之矣離為弓矢震為動故有公用射之象係之公者明其

在四而非五故也當解之時三陰退聽而无敢爭惟
上六一爻據高險之位以為二陽之勢有不能及故
傲然无順服之心猶之從田既獲三狐而鷙害之禽
獨在高墉之上必挾其器而待其時擬之而後發發
无不中矣故曰獲之无不利而子曰公用射隼以解
悖也九四之震兼體乎離狐矢之利以威天下有其
器矣上六之艮止而不去在解之時利有攸往有其
時矣一射而獲何不利之有哉子曰隼者禽也弓矢

者器也射之者人也君子藏器於身待時而動何不
利之有動而不括是以出而有獲語成器而動者也
說者乃以六三為高墉之隼而射之者上六不又悖
哉



周易經傳集解卷二十

欽定四庫全書

經部

周易經傳集解卷二十一

詳校官侍郎_臣李封

通政使司副使_臣莫瞻菴覆勘

總校官編修_臣王燕緒


校對官中書_臣石鴻臚

謄錄監生_臣史廷奭

欽定四庫全書

周易經傳集解損益卷二十一

宋 林栗 撰



序卦曰解者緩也緩必有所失故受之以損

損之成卦解之變也自解之損坎變為兌震反為艮

分陰分陽而成也坎為川兌為澤坎變兌者損川而為澤也震為長艮為少震反艮者損長而為少也解有二陽四陰陽為寡陰為衆分陰分陽者損有餘以補不足也解之成卦坎下震上皆陽也其四象則為陽者三為陰者一其八卦則為陽者六為陰者二變而為損則二儀四象八卦皆適平矣是損之道也方解之時上下二卦皆一陽而二陰私家之藏或擬於公室天子之富不越於諸侯於是之時損下益上固

其宜矣其曰緩必有所失何也曰難解之時事從寬
緩苟可以順民之欲與之更始无所不為若夫綱紀
條目必求其備則寬緩之政有不暇施矣故曰緩必
有所失受之以損其有所闕略之謂乎損下益上於
是為稱矣

損有孚元吉无咎可貞利有攸往曷之用二簋可用享
象曰損損下益上其道上行損而有孚元吉无咎可貞
利有攸往曷之用二簋可用享二簋應有時損剛益柔

有時損益盈虛與時偕行

下兌上艮成卦曰損者初為兌二為震三為坤四為艮損之言少也損有餘以補不足也艮為山兌為澤山高而澤深謂之損何也為其有震坤之象焉坤為土震為動山下之土為澤所動則山損其高澤損其深斯謂之損矣損之為卦損剛益柔損下益上故學者皆以泰否言之然彖言二簋可用享雜卦曰損益盛衰之始也若以泰否為說則盛衰之始難言其義

而二簋之享非其時矣蘇氏曰兌本乾也受坤之施而為兌則損下也艮本坤也受乾之施而為艮則益上也信斯言也六子之卦何獨不然而獨損益名之乎大抵損之為名由有餘而起也益之為名自不足而生也方解之時上下二卦皆一陽而二陰則下為有餘故損之以益上及損之時五畫在上其四在下則下為不足故損上而益之所謂損益盈虛與時偕行也然則損未嘗无益益未嘗无損何自為損何自

為益乎曰損益以盈虛為辨也損九三以益上六則三與上皆損故謂之損損九四以益初六則四與初皆益故謂之益二五者損益之主也在損則六居五而九居二是損也在益則六居二而九居五是益也此自然之數也山澤為損者山摧則損澤澤動則損山也風雷為益者雷震則益風風怒則益雷也此自然之象也損下益上君子以為損損上益下君子以為益此自然之義也故子曰損損下益上其道上行

損有孚元吉无咎可貞利有攸往何謂也曰此言六
爻之義也有孚元吉者謂六三六五也三居下而損
之以益上五居尊而自損以益下故也三之辭曰一
人行則得其友有孚之謂也五之辭曰或益之十朋
之龜元吉之謂也无咎可貞者謂九二上九也是二
陽者未嘗自損也為其居陰則已虛矣若又損之則
為太甚弗損可也故二爻上爻之辭曰弗損益之无
咎可貞之謂也利有攸往謂初九六四也初九之剛

不可不損六四之柔不可不益故也初之辭曰已事
遄往无咎四之辭曰損其疾使遄有喜利有攸往之
謂也所以然者損益之義由有餘不足而生若多寡
適均則无所損益矣是故有孚然後元吉无咎然後
可貞有攸往然後利皆互文以見義也故子曰損而
有孚元吉无咎可貞利有攸往夫子於此數言无所
解釋但加一而字以明之義自彰矣說者乃謂有孚
元吉无咎而後可貞利有攸往誠如是也毋乃辭費

乎曷之用二簋可用享何謂也曰此聖人觀會通以
行典禮也國莫重於禮禮莫重於享享親享帝謂之
享享諸侯亦謂之享方損之時百物不足以備禮苟
病其儉陋而廢之則不事天不嚴父咎孰大焉不惠
諸侯不樂嘉賓闕孰甚焉享多儀備物必致其豐則
是損人而自益殘民以奉神神弗之福也而況於人
乎聖人於此則曰曷之用二簋可用享享大禮也二
簋者至約之數也夫時所當損雖至約之物而可以

用於大享之禮況夫禮不及享而物有過此者乎子
路曰傷哉貧也生無以為養死無以為禮也孔子曰
啜菽飲水盡其歡斯之謂孝歛首足形還葬而無槨
稱其財斯之謂禮燔兔瓠葉菜羹瓜祭皆其義也自
漢以來議禮之家名為聚訟當其儀物有少不備寧
廢之而不舉蓋不知二簋應有時損剛益柔有時損
益盈虛與時偕行詳孔子此旨不但謂二簋用於難
解當損之時如曾子云國奢則示之以儉國儉則示

之以禮則二簋應有時矣政寬則民慢慢則糾之以
猛猛則民殘殘則施之以寬則損剛益柔有時矣日
中則昃月盈則食安而不忘危存而不忘亡則損益
盈虛與時偕行矣由是言之損益陰陽升降之理聖
人則與時偕行而已說者乃以損下益上為聚歛刻
剥之義然則有孚元吉无咎可貞利有攸往者其義
安在也孔子曰商因於夏禮所損益可知也周因於
商禮所損益可知也是益不必賢於損損不必不如

益也時所當損不可不損時所當益不得不益此損益之義也

象曰山下有澤損君子以懲忿窒欲

山者艮也澤者兌也山下有澤損之象也君子以懲忿窒欲者取諸山澤以為戒也清清之水蟻壤汨之巍巍之邱蹄涔齧之忿之移人猶山之損澤也欲之侵人猶澤之損山也子曰忿思難禮曰忿毋求勝一朝之忿忘其身以及其親可无懲乎書曰欲敗度禮

曰欲不可從飲食男女人之大欲存焉可无窒乎是
故欲全其為山則捍流潦欲全其為澤則禦隄潰是
懲忿窒欲之義也

雜卦曰損益盛衰之始也

損益二卦以盈虛消息而成其在六爻以終始盛衰
為義何則始乎損者卒乎盛也始乎益者終乎衰也
書曰滿招損謙受益孔子讀易至於損益喟然而歎
子夏曰夫子何歎焉子曰夫自損者必有益之自益

者必有決之吾是以歎也天道成而必變凡持滿而
能久者未嘗有也在與遇三人下之遇一人式之調
其盈虛不令自滿所以能久也是故損益諸爻以陰
居剛以陽居柔者應損之義以陽居剛以陰居柔者
應益之義豈特其本爻為然又將取承乘而別之初
之遯往四之使遯者剛柔之偏勝也二之利貞五之
元吉三之得友上之得臣者盈虛之相補也始於遯
往終於得臣者始損而終盛也始於大作終於勿恒

者始盛而終衰也損而不已必益益而不已必決始終之辨不其然乎

初九已事遄往无咎酌損之象曰已事遄往尚合志也初九兌也以陽居剛而在一卦之下應乎六四之艮而承九二之震故曰已事遄往无咎已止也遄速也初九之陽可謂有餘矣又承乎陽則益之又益者也初居最下之位而兼有餘之資在損之時當損下以益上滿而不損必有決之者矣宜止其事而速往以

益四乃為无咎也故曰酌損之酌取水也詩云汭酌
彼行潦挹彼注兹艮為山兌為澤以澤益山故有酌
損之象初九之陽六四之陰皆為有餘然酌而損之
在於初也子曰已事遄往尚合志也尚者上也謂六
四也裒多以益寡損有餘以補不足則與上合志不
亦宜乎

九二利貞征凶弗損益之象曰九二利貞中以為志也
九二震也以陽居柔而在下卦之中應乎六五之坤

而介於初九六三之際故曰利貞征凶初九陽也六
三陰也二居其間剛之得中也六四陰也上九陽也
五居其間柔之得中也征猶往也貞猶固也損道上
行二動而順其往宜也然九二六五既已損而中已
若又損之不已甚乎損之已甚物所不堪故以二五
為貞則利征斯凶矣故曰弗損益之說者或謂二弗
宜損益之可也夫過猶不及其咎均耳如二五者弗
可損弗可益剛柔相須多寡適稱中庸之道也故子

曰九二利貞中以為志也志非心志之謂書曰若射之有志是也中道而立過之者俯而就之不至焉者跂而及之斯以為志而已矣或曰損之已甚何遽凶乎曰漢高帝唐太宗古今納諫之主也蕭何為民請上林棄地高帝怒曰相國多受賈人金為民請吾苑以自媚於民皇甫德參上書諫修洛陽宮太宗恚曰是子使國家不役一人不收斗租宮人无髮乃稱其意向非魏鄭公王衛尉之對二人者亦幾不免矣征

凶之戒可不知乎

六三三人行則損一人一人行則得其友象曰一人行
三則疑也

六三上體為坤下體為巽以陰居剛而在下卦之上
應上九而乘九二二爻皆震也故曰三人行則損一
人一人行則得其友損之成卦損九三以益上六也
初二皆陽至三而變是三人同行獨損一人也六三
獨行與上相應是一人行則得其友也三人行而損

一人何也兩則合三則疑也數起於一合於兩成於
三成而不虧者未之有也一者始也二者中也三者
終也終而不變者未之有也三人同行而二人相得
其一人者可无損乎凡易之情近而不相得則凶或
害之悔且吝不損其一則悔吝隨之矣一人行則得
其友何也天下之物未有无其偶者貳其心則同室
而不應一其志則千里而相求今六三一爻體乎坤
巽而其所應與其所乘皆體乎震若不棄九二而欲

求上九未有能得之者也故子曰一人行三則疑也
又曰天地絪縕萬物化醇男女構精萬物化生言致
一也天地之所以化醇男女之所以化生皆以其精
氣之相交絪縕之相感故曰其為物不貳則其生物
不測若二其情而睽其志則生生之道廢矣三之得
友其致一之謂歟

六四損其疾使遄有喜无咎象曰損其疾亦可喜也

六四上體為艮下體亦為艮以陰居柔而在上卦之

下應乎初九之兌而介於六三六五坤巽之間故曰
損其疾使遄有喜无咎偏陰偏陽謂之疾陰陽相得
謂之喜六四以陰居柔而承乘皆陰可謂疾矣初九
之剛酌而損之是損其疾也遄之言速也艮為止兌
為說艮兌二少有相與之情焉初九已事而遄往六
四損其疾而使遄也使者物或使之非其自能也損
初九以益六四故初言合志而四言有喜君臣父子
夫婦朋友未有不相須以成者有喜无咎不亦宜乎

故子曰損其疾亦可喜也甘酸之不節淫溺之不禁雖有盧扁之醫丹石之劑其能有益哉能損其疾斯為可喜矣

六五或益之十朋之龜弗克違元吉象曰六五元吉自上祐也

六五坤也以陰居剛而在上卦之中應九三而乘上九二爻皆震也故曰或益之六五之義見於九二固宜无所損益矣然而或益之者何哉自天祐之非人

之所能為也非其求而得之是以謂之或也書之所
謂謙受益孔子之所謂自損必有益之是也夫以二
五之得中固已足乎已而无待於外矣而上九之富
又自上而益之是以有或益之象也故曰十朋之龜
弗克違元吉十盈數也朋衆辭也爾雅有十龜之名
漢書新莽傳有十朋龜貞之說龜者決疑之物神明
之所寓也自二至上有龜之象焉離為龜頤為靈龜
是也書曰汝則從龜從筮從卿士從庶民從是之謂

大同身其康彊子孫其逢吉今也十朋之龜莫之能
違其為元吉也可知矣天且不違而況於人乎況於
鬼神乎是以謂之元吉也或曰十朋之龜直謂卜筮
而已乎曰非也賢人君子智謀之士國之所賴以為
著龜也六五之君九二之臣既相與以為治矣濟濟
多士生此王國考古以詔今忘軀而徇主者皆十朋
之龜也或曰六三上九聖人方以致一明之而乃為
六五之益何也曰六五者損之主也上九者損之終

也由六三而言則一人行而得其友由六五而言則上下剛柔皆五之所為損益也上九居損之終自上祐之謂之益也不亦宜乎故子曰六五元吉自上祐也嗚呼天之所助者順也人之所助者信也豈以物之豐儉為厚薄也哉損之享也至於用簋而自天祐之獲十朋之龜王者之所以事天可以鑒此矣

上九弗損益之无咎貞吉利有攸往得臣无家象曰弗損益之大得志也

上九震也以陽居柔而在上卦之上應六三而乘六
五二爻皆坤而三又巽也故曰弗損益之无咎貞吉
利有攸往之上弗損益之无咎貞吉與九二均也然
二為征凶而上為利有攸往何也曰此雜卦所謂盛
衰之始也在損之時始乎衰而卒乎盛九二在卦之
下損而得中又欲何往乎是以往凶也上九居卦之
終窮則變矣由損而之益是以利有攸往也故曰得
臣无家上為震三為巽三也者上之臣也三去其朋


獨行以應上故有得臣无家之象為人臣者以身殉國不顧其家苟人主得而用之何功之不立何事之不成哉是以利有攸往也故子曰弗損益之大得志也益之初九即損之上九也益之象曰利有攸往其初爻曰利用為大作元吉无咎其大得志之謂乎

巽艮坤震

震下

益

巽上



艮兌

序卦曰損而不已必益故受之以益

益之成卦損之反也自損之益艮反為震兌反為巽
上下相益而成也益之九五損之九二也益之六二
損之六五也六居五而九居二是以謂之損六居二
而九居五是以謂之益也艮兌為少震巽為長自少
而長益之象也或曰陽為益陰為損損二陽在下其
一在上至益而反之為損上而益下也曰損下二陽

其實兌也益下二陰其實震也陽為實陰為虛陽為寡陰為衆未可以奇偶而分損益也以陰居陰以陽居陽則謂之益以陽居陰以陰居陽則謂之損斯為可矣損之為言不足益之為言有餘損益二卦其畫皆九其五在上其四在下是損下而益上也其五在下其四在上是損上而益下也震巽為益兌艮為損震巽者長養之日而兌艮者斂藏之時也損益之義於是乎取之矣物極必反道窮必變兌艮之後繼以

震巽損而不已必益豈不然哉

益利有攸往利涉大川象曰益損上益下民說无疆自
上下下其道大光利有攸往中正有慶利涉大川木道
乃行益動而巽日進无疆天施地生其益无方凡益之
道與時偕行

下震上巽成卦曰益者初為震二為坤三為艮四為
巽震為雷巽為風雷下而風上謂之益可乎曰未也
為其有坤艮之象焉坤也者萬物之所致養也艮也

者萬物之所成終而所成始也雷以動之風以散之
致役乎坤而成乎艮斯之謂益矣故曰益損上益下
民說无疆自上下下其道大光元元之民愛之則親
利之則至損上益下民說无疆也不亦宜乎震自損
之上反居益之初在六二坤象之下坤為民震為動
動而得民者以其下之也自後者人先之自下者人
高之自上下下其道大光也不亦宜乎益利有攸往
利涉大川何謂也曰震為動而在卦之下有攸往之

象馬兌為澤而在卦之上有大川之象焉巽為木而震動其上有乘舟利涉之象焉益有二震初九者動之始也九五者位乎中正也其動之始也應乎六四之巽其位乎中正也應乎六二之坤是以利有攸往而利涉大川也昔之欲用其民者必能損己以益之是故可與赴白刃蹈水火而忘其死矣故子曰利有攸往中正有慶利涉大川益道乃行益字誤為木伊川程氏辨之矣說者以卦有木象故不取程說非也

或難曰乾自配坤震自配巽今吾子以乾遇巽震遇坤皆強而合之何也曰乾為金巽為木陽金陰木是以謂之合也震為木坤為土陰土陽木是以謂之合也豈苟云乎哉夫子既釋彖辭又從而暢之曰益動而巽日進无疆天施地生其益无方凡益之道與時偕行何謂也曰震巽者乾坤之一索也覆而取之有兌艮焉兌艮者乾坤之三索也震為元巽為亨兌為利艮為貞而中含坤象坤為地為母萬物之資生也

是以言日進无疆也震為東巽為南兌為西艮為北
是以言其益无方也震為春巽為夏兌為秋艮為冬
是以言與時偕行也損之與時偕行亦如是爾聖人
以咸恒言夫婦始終之道以損益言上下盈虛之理
文雖參錯而旨則同歸學者可以深求而自得之也
不然則震巽成卦奚取於无疆无方之義哉

象曰風雷益君子以見善則遷有過則改

風者巽也雷者震也雷上風下則其常也風上雷下

是相益之義也雷下則風高而益號風上則雷近而益震是之謂益矣君子見善而遷則過日以遠聞過而改則善日以崇亦猶是爾及其相益而不已也則雷風作莫測其鼓之舞之之形君子之行孰知其遷善改過之跡是以儼而象之也傳曰積善在身猶長日加益而人不知也又曰與善人處如入芝蘭之室久而不聞其香即與之化矣遷善改過為益也宜哉故曰損德之修也益德之裕也損先難而後易益長

裕而不設損以遠害益以興利裕猶益也遷善改過所以裕其德而興利也懲忿窒欲所以修其德而遠害也由損而益所謂先難而後易也其益无方所謂長裕而不設也

雜卦曰損益盛衰之始也

雜卦之義已解在前以陰居剛以陽居柔則謂之損以陰居柔以陽居剛則謂之益是故損之初九六四為益而不為損益之六三上九為損而不為益四又

之象皆不應卦義然初九已事遄往六四損其疾使
遄有喜无咎六三益之用凶事上九莫益之或擊之
立心勿恒凶者何也初九六四損之始也志在於損
而始乎益必能損下以益上是故有喜而无咎也六
三上九益之終也志在於益而終乎損者豈其情哉
其必有決之者矣是故立心勿恒凶也乃若初九之
无咎六二之永貞六四之有孚九五之元吉則應其
義矣上下相孚以成其益元吉无咎不亦宜乎

初九利用為大作元吉无咎象曰元吉无咎下不厚事也

初九震也以陽居剛而在卦之最下應六四而承六二二爻皆坤而四又巽也故曰利用為大作大作者大有為也益之初九損之上九也自上而來在坤之下得以貴下賤之義故上言利有攸往而初言利用大作也震為動坤為民故有為民大作之象坤順也巽巽也由動而巽順以成之事行而不悖令出而无

違是以作而无不利也故曰元吉无咎既曰元吉而
又曰无咎何也興作之事勞民動衆吉而未免於有
咎者多矣是以既曰元吉而又曰无咎與師吉无咎
之義同也子曰元吉无咎下不厚事也下字誤為不
下下者象之所謂自上下下其道大光者也損已以
益人自上而下下仁厚之事也元吉无咎不亦宜乎
元者善之長也君子長民之道也時君世主所以作
不順而為无成者惟宮室是營臺池是葺從一已之

欲而弗百姓之心也君子曰以佚道使民雖勞不怨
孔子之稱禹曰卑宮室而盡力乎溝洫禹吾無間然
矣夫如是又何咎之有哉繫辭曰斲木為耜操木為
耒耒耨之利以教天下蓋取諸益皆厚下之事也益
以興利其斯之謂矣

六二或益之十朋之龜弗克違永貞吉王用享于帝吉
象曰或益之自外来也

六二坤也以陰居柔而在下卦之中應九五乘初九

二爻皆震也故曰或益之九五六二既相為益矣而
初九之剛又自外来益之是以有或益之象也故曰
十朋之龜勿克違永貞吉自初至五有龜象與損之
六五稱龜同也益之初即損之上益之二即損之五
是以二爻之辭畧同所以異者五為元吉而二為永
貞吉君臣之道也或曰子謂十朋之龜賢人君子之
象人君獲之是以元吉六二既非君之道何以亦言
十朋之龜乎曰卜筮決疑達于上下豈直王者用之

哉周公相成王一飯三吐哺一沐三握髮惟恐失天下之賢人者重十朋之龜也若曰居人臣之位以身任天下之重而无賴於多士者吾未見其能濟也賢者為之謀智者為之慮夫豈皆其智力之所及哉其必有陰相之者矣故五言自上祐也二言自外来也皆係之神明非人力之所能為也惟龜筮之无違天人之咸助而能永保其貞斯人臣之吉矣故又曰王用享于帝吉王之享帝與臣之享上其義一也位乎

地而應乎天體乎坤而順乎震是豈以犧牲玉帛為
享者哉固有以當天心矣損言二簋於彖益言享帝
於爻蓋互發其文也

六三益之用凶事无咎有孚中行告公用圭象曰益用
凶事固有之也

六三上體為艮下體亦為艮以陰居剛而在下卦之
上應乎上九之兌而介於六二六四坤巽之間故曰
益之益之六三損之六四也在損而居四故宜損其

疾在益而居三故宜益之也當益之時損上益下六
三承乘皆陰而又以陰居之宜損上九之剛以益之
斯為可矣然艮為山兌為澤相與為損而不為益上
九居益之終以高為說非能自損以益下者也故曰
用凶事无咎凶事有三有扎瘥之政有死喪之禮有
兵革之事今益之時損上益下其凶荒扎瘥之政乎
艮為冬震為春民食匱於冬則王澤行於春故有救
災恤凶之象夫損上益下亦不可以為常也唯用之

於荒政則无咎矣故又曰有孚中行告公用圭中行
謂九五也五體乎震故也有孚謂六四也四於三為
近而五為孚也圭於古者以為信若今符節之類周
官典瑞珍圭以徵守以恤凶荒是也四體巽巽為命
令為潔齊故有告公用圭之象六三宜益而莫之益
上九宜損而不自損以六四之才孚于九五而請命
於中行自五有命告之用圭是以用凶事而无咎也
子路為蒲宰與民修水備閔其匱餓而予之一簞食

一壺漿孔子使子貢止之子路忿然曰夫子以仁教而禁其行也由也不受孔子曰汝以民為餓何不白於君發倉廩以賑之而私以汝食饋之是明君之无惠而見已之德美矣汝速已則可不則汝之見罪必矣漢汲黯矯制發河内倉粟以賑饑民苟非有孚于上其能无咎也哉子曰益用凶事固有之也當益之時不能使家給人足而至用凶荒之政固有其咎矣然天災流行國家代有救災賑乏曾何咎之有哉

六四中行告公從利用為依遷國象曰告公從以益志也

六四上體為坤下體為巽以陰居柔而在上卦之下應初九而乘九五二爻皆震故曰中行告公從利用為依遷國益之六四損之六三也在損而居三故言得友在益而居四故言遷國也初者四之配也故初言利用大作而四言利用遷國互明之也中行九五也初九六四雖有大作之宜然必孚于九五告而從

之然後可為也依猶從也詩云謀之不臧則具是依
興作之事无大於遷國者然且從之則小者可知矣
傳曰懷與安實敗名又曰宴安鴆毒不可懷也先王
知其然是故通其變使民不倦商之賢王不常厥邑
者豈厭安逸而思勞苦也哉盤庚之籲衆曰若乘舟
汝弗濟臭厥載此益之所深戒也故其彖曰利有攸
往利涉大川而初九六四皆有利用之辭變通之義
也以六四之柔順九五之中行謀无不從計无不合

斯可以大有為矣故子曰告公從以益志也九五之志在於益下則其從之不亦宜乎益志者惠心之謂矣

九五有孚惠心勿問元吉有孚惠我德象曰有孚惠心勿問之矣惠我德大得志也

九五震也以陽居剛而在上卦之中應六二而乘六四二爻皆坤而四又巽也故曰有孚惠心勿問元吉震巽配也震坤合也震者萬物生長之時而坤者溥

博无疆者也九五居得致之位操能致之資有至誠
惠下之心勿問其親疎遠近此疆爾界而一視之六
二自遠而應六四自近而比相與為益民說无疆至
於初九之大作六三之凶政无不得其所欲信乎德
施之普矣謂之元吉不亦宜乎益之五即損之二也
在損而居二故為利貞在益而居五故為元吉也或
曰當益之時損上益下而九五處於至損乃為元吉
何也曰有若不云乎百姓足君孰與不足百姓不足

君孰與足是故初九六四者君能下下以成其政也
六二九五者臣能歸美以報其上也故曰有孚惠我
德我之有孚于人則人之有孚于我固其宜也君之
愛民如其子則民之愛君如其父母君之視臣如手
足則臣之視君如腹心是所謂有孚惠我德也故子
曰上有至誠惠下之心下有至誠德上之意何欲而
不得何求而不遂哉

上九莫益之或擊之立心勿恒凶象曰莫益之偏辭也

或擊之自外来也

上九兌也以陽居柔而在上卦之上應六三之艮而乘九五之震故曰莫益之益之上九損之初九也在損而居初故能酌損之在益而居上故莫之益也初九之於六四九五之於六二我有以益之彼亦有以益于我是以元吉无咎上九之於六三我无以益之彼亦莫肯益于我相與為損日昃月削至於亡而已矣故曰或擊之當益之時九五居尊受天下之益而

上九傲然據於其上不能自損以益下或擊之也不亦宜乎周蒯良夫諫厲王曰夫王人者將導利而布之上下者也苟或專之其害多矣故曰立心勿恒凶恒久也變而通之恒久之道也在易之恒雷風相與者也其在於益風雷相益者也使益之上九能變而通之斯可以久而无咎矣求益而不已貪利而无厭真无恒之人也其凶宜哉故子曰莫益之偏辭也或擊之自外来也我莫肯益物物莫肯益我皆私已一

偏之辭也六三之艮雖與上不能相益烏能反害之哉然則或擊之者自外來也或曰易以上卦為外下卦為內初九六二內卦也謂之自外來何也上九外之極也擊之者亦自外來何也曰子不云乎自損者必有益之故損之六五得益於上九反而為益則益之六二得益於初九謂之自外來者明其自上九而來也自益者必有決之故益之上九居外卦之極乘九五之剛有澤上於天之象益雖利涉大川然至此

而後決謂之自外来者明其將變而為夬也子曰君
子居其室出其言善則千里之外應之况其邇者乎
居其室出其言不善則千里之外違之况其邇者乎
是以六二上九之辭皆稱或而夫子明其自外来也
謂夫禍福之无方吉凶之不測是以君子畏之也子
曰君子安其身而後動易其心而後語定其交而後
求君子修此三者故全也危以動故民不與也懼以
語故民不應也无交而求則民不與也莫之與則傷

之者至矣上九陽也陽為動而乘五之尊危以動也
其體兌兌為口舌而當震之威懼以語也其應艮艮
為止而不能自損以益之方且求益而不已是无交
而求也傷之者至不亦宜乎或曰初九之於六四六
二之於九五既相益矣上九苟自損以益六三則三
與上皆益豈非益而不已者哉曰上九苟自損以益
六三則一陰一陽離下坎上既濟之象也烏有一偏
之咎哉

周易經傳集解卷二十一

欽定四庫全書

周易經傳集解卷二十二


宋 林栗 撰

兌乾乾乾

乾下

夬

兌上



序卦曰益而不已必決故受之以夬夬者決也

夬之成卦益之變也自益之夬震變為乾巽反為兌
一陰五陽而成也夫所以為益者損上而益下也益
而不已則上九之兌乘乎九五之尊兌澤也五天位
也澤上於天其勢必決故取二爻之象以為一卦之
體然後澤上於天著見於外而夬之形成矣昔夫子
觀欬器喟然嘆曰夫物烏有滿而不覆者哉然則益
之上九求益而不已是以決而去之兌反居四從天
而下也

夫揚于王庭乎號有厲告自邑不利即戎利有攸往彖
曰夫決也剛決柔也健而說決而和揚于王庭柔乘五
剛也乎號有厲其危乃光也告自邑不利即戎所尚乃
窮也利有攸往剛長乃終也

下乾上兌成卦曰夫者自初至三皆為乾而四乃兌
也乾為天兌為澤乾者陽之至尊兌者陰之至卑莫
高乎天莫下乎澤今而反之澤上於天未有不決者
也乾為金兌亦為金兌澤中之金有頑鑛之氣而乾

之為金精明堅剛柔粹者也以頑鑛之金而乘堅剛
之利未有不決者也故曰夫決也剛決柔也五陽而
決一陰是以謂之夫也陽自復臨泰壯浸長而消陰
至夫而後決也或曰五陰消陽謂之剝五陽消陰謂
之決其義何也曰剝剝也剝果謂之剝剝廬謂之剝
山附於地謂之剝凡此者皆物宜在上者也剝而落
之是以謂之剝也夫決也決水謂之決決癰疽謂之
決澤上於天謂之決凡此者皆物宜在下者也決而

潰之是以謂之夬也故子曰健而說決而和乾健也兌
說也內健則不挫外說則不爭健以為決說以為和
君子之治小人也順其勢而利導之若決積水於千
仞之上功成而无後患者健而說決而和故也夬揚
于王庭孚號有厲告自邑不利即戎利有攸往何謂
也曰九五天位也王者之象也庭外虛也九五為王
宮故上六有王庭之象揚播也上六為巽巽為風為
號令故有揚庭孚號之象所以揚于王庭者以五陽

進而一陰乘之也陽為君子陰為小人一小人而乘
衆君子其義不可以不決也小人一而君子衆其勢
則可以決之矣是故揚于王庭正明其罪而決之也
孚信也厲危也君子至衆小人至寡雖曰可決有危
道焉何則上下无陽則一陽者衆陰之所求也上下
无陰則一陰者衆陽之所與也今上六之陰雖處至
窮之勢然九五與之為比九三與之為應九四與之
同體其免於係累者獨初九九二耳初九九二遠於

上六雖欲決之其勢有所不及彼三陽者苟或陰為之主其危不亦近乎然夫之諸陽皆體乾健之德其肯係累於小人而墮君子之朋哉故曰有厲曰有戎曰有凶有之為言不必然之辭也五陽相信而不忘於號令知其危而戒之斯有萬全之勢而無一跌之虞矣邑內也戎外也九二之惕號告自邑者也九五之夫夫即戎者也夫以五陽而決一陰有百勝而無一敗自常情觀之宜若無足憂者然薰狐有鑒城之

嫌灼蠹有焚木之慮鳥獸之窮猶能攫搏而況於人乎是故勞心以務外者不若治內而外自平窮兵以服遠者不若修近而遠自至舜舞干而苗格文王修教而崇降此告自邑不利即戎之義也然則利有攸往何謂也曰兵法所謂歸師勿遏圍城必闕者豈將縱舍之而已乎蓋優游寬緩而取之耳夫君子之心未嘗不欲天下皆君子也不幸而小人在上託附於至尊而乘君子之隙擊之則懼於不勝而反受其禍

舍之則小人不除常在君側未有不害治者也是以
夫之君子夙夜危懼更相儆戒常若寇至苟吾黨之
志堅而不可動則小人自當退聽革心易慮化為君
子矣苟為不然然後揚于王庭決而去之所以為健
而說決而和不利即戎利有攸往者也故子曰揚于
王庭柔乘五剛也乎號有厲有危乃光也告自邑不
利即戎所尚乃窮也利有攸往剛長乃終也其危與
否之九五其亡之義同當夫之時尚於剛決苟專其

所尚能剛而不能柔乃取窮之道也小人雖不可不防而君子之道不可以不長是以利有攸往由夫而為乾則剛長之終也可不務乎

象曰澤上於天夫君子以施祿及下居德則忌

澤者兌也天者乾也澤无在天上之理而此象言之者謂澤之氣上蒸于天也澤蒸于天势无不决必将降而為雨也君子者民之所望以為膏澤者也既已得時得位在王庭矣又可吝其澤而不施乎故用夫

之象施祿以及下則自天而降沛然无不被矣然澤之為雨天之施也君子之及物人主之德也若居而有之是貪天之功以為己力也以兌而乘乾以六而乘五其能以久安乎故曰君子以施祿及下居德則忌也或曰需之象曰雲上於天需雲者坎也坎為水為雨不曰雨不曰水而謂之雲不曰夫而謂之需何也曰坎流水也兌止水也為其流也故或為雨或為雲為其止也故為澤而已雲之在天流行散徙未必

皆為雨也是以謂之需也澤之在天有下而已雖欲
不雨其可得乎是以謂之夬也所以然者陰陽和而
後雨坎之從乾皆陽也是以雲而未雨也兌之從乾
則剛下柔上矣膏澤之降不亦宜乎

雜卦曰夬決也剛決柔也君子道長小人道憂也

夬之為卦以五剛一柔而成其在六爻以君子決小
人為義不曰君子道長小人道消而曰小人道憂者
此聖人之深旨也雜卦六十二皆一辭而已蓋有合

兩卦而言之者獨夫姤疑於辭費夫之四言又係於
雜卦之末其辭非隱奧難曉學者可以不問而知故
莫肯深考以爲偶然而已可不惜哉夫以五剛而決
一柔君子之道可謂長矣而小人之道其窮若此能
勿憂乎我盛而長則無意外之慮彼窮而憂則有先
事之防然則以五剛而決一柔吾未知勝負之所在
也樂毅破齊下七十餘城所未下者莒即墨二城耳
夫差破越盡有其地以甲楯五千棲之於會稽然即

墨終以破齊而復燕會稽終以滅吳而霸越皆窮而憂者也齊湣之敗夫差之亡皆百勝而無憂者也可不懼哉是以聖人於夬之六爻未嘗不丁寧而儆戒之初九有不勝之咎九二有莫夜之戒九三有壯頄之凶九四有无膚之悔九五有覓陸之咎上六有无號之凶者誠以我盛而長彼窮而憂故也是故夬之君子不患其不剛而患其不能柔也不患其不健而患其不能說也不患其不決而患其不能和也不

患其不往而患其即戎也是故夫之六爻以剛居柔者處夫之善者也以剛居剛者志於夫而已聖人之所甚懼也然初九最遠於上六不往則无咎矣九三與上六為應遇雨則无咎矣九五切近於上六中行則无咎矣惟九二之惕號九四之次且乃為善也或曰雜卦之義既得闕矣敢問係於諸卦之末亦有其說歟曰此彖之所謂不利即戎利有攸往者也不利即戎故丁寧諄復不以為煩利有攸往故係於諸卦

之末明其一變而遂為乾也聖人之旨可不究歟

初九壯于前趾往不勝為咎象曰不勝而往咎也

初九乾也以陽居剛而在下卦之下上无其應而承於九二二亦乾也故曰壯于前趾趾所以行也壯趾則欲行而已乾健也剛亦健也以剛居剛以健濟健有進而已聖人之所以戒之也故曰往不勝為咎大之諸爻大率與壯相類所以異者大壯四陽夫五陽耳大壯之初九曰壯于趾者以初在下故謂之趾也

而又益以一陽故夫之初九曰壯于前趾明其勢益
強則其志益銳也然五陽之勢足以決一陰而无疑
所以朝夕儆戒而莫敢先動者有所待焉而初九處
最遠之地居最下之位以欲進之心持必決之志不
量其力不度其時往而不勝是自為其咎者也非不
幸也慶厯中仁宗進用韓琦杜衍范仲淹富弼在政
府歐陽修余靖王素蔡襄為諫官夏竦羅樞密使魯
人石介作聖德頌指言忠邪之辨當此之時可謂夫

之世矣然介卒以不克而斥死於遠方身沒而幾有
斷棺之禍自是朋黨之論始興而君子小人迭為勝
負矣介之無成非不幸也自為之咎也時韓范二公
自陝入覲聞介此頌歎曰天下事正坐此輩壞却若
二公者可謂中行之君子矣故子曰不勝而往咎也
昔之觀人者觀其邪正而不要其窮達論事者論其
是非而不計其成敗夫豈以不勝而為其咎也哉蓋
君子之舉也見可而進知難而退初九以必不勝之

勢而僥幸於不可成之功此其所以戒之也

九二惕號莫夜有戎勿恤象曰有戎勿恤得中道也

九二乾也以陽居柔而在下卦之中上无其應而承於九三三亦乾也故曰惕號莫夜有戎勿恤惕者危懼之貌也號儆戒之辭也莫夜者人情懈怠之時而事變不測之際也有戎者未必然之辭也勿恤者甚之之辭也夫乾天下之至健也德行常易以知險而九二居中得剛柔之節明得喪之理故能憂懼而儆

戒以為莫夜之間將有寇戎乘吾之隙其可以勿恤乎易以下卦為晝上卦為夜故九二之視九四有莫夜之象猶乾之夕惕也三與上為應四與上同體則有戎之恤不亦宜乎故子曰有戎勿恤得中道也

九三壯于頄有凶君子夫夫獨行遇雨若濡有愠无咎象曰君子夫夫終无咎也

九三下體為乾上體亦為乾以陽居剛而在下卦之上應乎上六之巽故曰壯于頄有凶頄顙骨也壯之

見于面者也三以陽居剛而在下卦之上故有壯頤
之象書曰爾无愆疾于頑語曰人而不仁疾之已甚
亂也君子剛中而柔外无怨而无惡故能使小人革
心而順服今九三與上六為應而乃見其壯於顏面
之間則小人懼矣小人懼則將畜其愆戾以致毒于
我蜂蠆有之而況人乎二之有凶固其宜也故曰君
子夫夫獨行遇雨若濡有愠无咎夫夫也夫夫者決
之又決也為其一爻而有重乾之象是以謂之夫夫

也雨陰陽和也諸陽莫應於上六而九三獨應之又
有乾巽之合是以謂之獨行而遇雨也獨行而遇雨
宜若濡矣然君子上交不諂下交不瀆磨而不磷涅
而不緇雖遇雨若濡而實未嘗濡也夫君子之與小
人如水炭之不相入也君子之欲去小人猶小人之
欲无君子也故詩曰憂心悄悄愠于羣小今以五陽
而決一陰而九三之君子與之為應其不濡者幾希
矣則其同類之愠不亦宜乎然君子之勢如此其盛

小人之黨如彼其衷而九三以重剛之體懷夫夫之心豈將捨此而從彼哉將以釋其忿戾之情而開其柔服之意不得不如是耳由是言之愠之者過也非九三之咎也不忍於遇雨之愠而寧受壯頤之凶斯為咎矣故子曰君子夫夫終无咎也

九四臀无膚其行次且牽羊悔亡聞言不信象曰其行次且位不當也聞言不信聰不明也

九四下體為乾上體為兌以陽居柔而在上卦之下

下无其應而承於九五之乾連於上六之巽故曰臀
无膚其行次且臀體之末也陽為實陰為虛四與五
上同體四五皆陽而上為陰是四之臀无膚也臀无
膚而位不當故其行次且然處則不安行則不進也
夫之五陽惟二四居柔二遠於上而近之又與之同
體至于次且其行則四之操心危而慮患深矣故曰
牽羊悔亡聞言不信四體兌兌為羊上體巽巽為繩
故有牽羊之象兌為口舌巽為不果故有聞言不信

之象羊很而喜觸者也以陽五而決一陰有餘力矣
何至于觸藩而自羸其角也哉為其同體而牽去其
羊斯无悔矣大壯之悔亡亦猶是也四之牽羊也豈
徒然而已將至誠惻怛而致其教戒焉使其革心而
為善也君子又何求哉然上六陰柔聞其言而不能
信至於惡積而不可揜罪大而不可解然後揚于王
庭與衆棄之此小人之所以甘心於鈇鉞而无所歸
怨者也故曰健而說決而和九四之謂矣故曰其行

次且位不當也聞言不信聰不明也

九五覓陸夫夫中行无咎象曰中行无咎中未光也

九五乾也以陽居剛而在上卦之中下无其應而承

於上六之巽故曰覓陸夫夫覓陸草名柔脆易折之

物也乾為金巽為藩鮮故有覓陸夫夫之象夫夫者

決之又決者也以覓陸之柔折而拔之易耳何至于

決之又決乎夫九五者陽之至盛者也上六者陰之

至窮者也以至剛而決至柔以至盛而決至衰譬猶

以精金利器決柔脆之草決而不中則或傷之已荆山之玉不以投鼠隋侯之珠不以彈雀以九五之金決上六之覓何以異於是唐太宗之征高麗文宗之誅宦官是也所以然者為其不圖萬全之功而僥倖於一戰之勝豕之所謂不利即戎者也故曰中行无咎中未光也夫極剛健而以中行之宜其光明而不疚矣今也用於覓陸至於夫夫僅能无咎而已此其所以為未光者歟子曰乎號有厲其危乃光也則五

之即戒未光宜矣或曰九三一爻而有重剛之象是以著夫夫之辭五之為乾一而已其係之夫夫何也曰五天位也乾為天是亦重乾之象矣飛龍在天亦猶是也

上六无號終有凶象曰无號之凶終不可長也

上六巽也以陰居柔而在上卦之上應乎九三而乘於九五二爻皆乾也故曰无號終有凶號有二有揚庭之號有儆戒之號乾為健巽為號人情常謹於始

而怠於終敬其大而忽其小畏其所難而蔑其所易
陽之盛至於九五陰之窮極於上六則向之惕號者
有時而怠矣故戒之曰无號終有凶言儆戒之不可
忘也夫之諸爻皆警戒之意至于上六夫之終也小
人之罪既已著明矣苟无揚庭之號以正其典刑是
又養寇而遺患者也故曰无號終有凶言事機之不
可失也桓彥範不殺武三思以為机上肉耳此则无
號之凶也故子曰无號之凶終不可長也一日之長


為姤為遯為剝為否凶之漸也可畏哉聖人之愛君子而憂小人至矣

乾 乾 乾 巽

巽下

乾上

姤



序卦曰夫者決也決必有遇故受之以姤姤者遇也

姤之成卦夫之反也自夫之姤乾反居上兌反為巽

初上相易而成卦也乾反居上則剛長之極矣兌反
為巽則柔服之甚矣剛長之極而柔伏之甚此小人
之所以遇君子也夫陰陽相求物之情也剛柔相推
時之運也窮於上必反於下決於此過於彼自然之
理也陽之用事極於季夏一陰相遇而秋矣是故夏
秋之交為陽盛而陰伏是其所遇之然一陽為復
一陰為姤終則復始剛柔相遇則同也陽謂之復陰
謂之姤何也曰陽復於艮萬物歸根復命之時也陰

過于坤萬物著見之時也乾之從巽必出乎兌巽之從乾必出乎離然後相遇于坤坤者中也孟秋之月也夫是以謂之姤也若復之坤震則不相遇矣坤土也艮亦土也艮反於土動而成震夫是以謂之復也聖人內剛而外柔內君子而外小人以陽為主陰為客故陽來謂之復而陰來謂之姤也夫豈特聖人之心然哉亦本於天地自然之理而已矣

姤女壯勿用取女彖曰姤遇也柔遇剛也勿用取女不

可與長也天地相遇品物咸章也剛遇中正天下大行也姤之時義大矣哉

下巽上乾成卦曰姤者初為巽自二以往皆為乾乾健也上健而下巽斯以為遇巽巽也乎曰未也乾西北也巽東南也東南西北橫亘相直是以謂之遇也乾之從巽必出乎兌巽之從乾必出乎離然後相遇於坤坤者申也陽之終陰之始相遇於未申之間是以有天地相遇之象而其卦為姤也乾為金巽為木

陽金陰水相得而有合是以謂之遇也故子曰姤遇也柔遇剛也說者皆以一柔而遇五剛斯謂之姤愚謂一柔而遇五剛爭寵之道也而何遇之云乎謂夫一陰方來始與陽遇是以謂之姤也姤女壯勿用取女何謂也曰巽長女也卦唯一陰為主於內五陽皆欲求之壯甚也姤之言遇也詩云邂逅相遇是也不待其配遇人而合不可取之女也然而天地不相遇則品物不章君臣不相遇則政化不行所惡於遇者

非惡其合也惡其長也婦人之義從一而終使初六之遇九二遂止而不往則如姤之象復何尤哉為其一柔而五剛既遇不已又舍而之他惟其所遇剛不能制是以不可取也故子曰勿用取女不可與長也天地相遇品物咸章也剛遇中正天下大行也剛雖遇柔而不失其中正則風行天下无乎不被矣故又贊之曰姤之時義大矣哉一陰之來雖有消陽之漸然遇之以中正則順伏而无違教化之行民用和睦

姤之時義斯為大矣說者以剛遇中正為二五之遇是謂執文害辭失所謂柔遇剛之義矣

象曰天下有風姤后以施命誥四方

天者乾也風者巽也風也者天之號令也風行天下其施命誥四方之象乎是故夫之上九風行天上則曰揚于王庭姤之初六風行天下則曰后以施命誥四方也或曰然則風行天上其卦為小畜何也曰小畜之巽在四而九五乘之是以為懿文德密雲而不

雨也夫之巽在上而乘乎九五矣雖欲畜之其可得乎是以謂揚于王庭施祿以及下也

雜卦曰姤遇也柔遇剛也

姤之為卦以一柔五剛而成其在六爻以柔遇剛為義夫彖既言之矣雜卦又申言之不幾於贅乎曰彖也者一卦之義也雜也者六爻之義也彖與爻同聖人不以強而別爻與彖異聖人不以苟而合至于夫姤之義觀其彖則見其爻觀其爻則知其彖是以重

復其辭而不以為煩也或曰若是則一辭而足矣既謂之遇而又曰柔遇剛也豈非贅與曰易之言遇多矣有剛柔相遇者同人之二五師克相遇是也有以剛遇剛者睽之初九遇元夫是也有以柔遇柔者小過之六二遇其妣遇其臣是也有以剛遇柔者豐之初九遇其配主九四遇其夷主是也若曰遇而已矣安知非二五之相遇乎故曰姤遇也柔遇剛也豈是得已而不已哉初六係柁而貞吉九二包魚而无咎

者以其遇之也九三有次且之厲九四有无魚之凶
九五有包瓜之隕上九有上窮之吝者為其不遇而
求之也然姤之陽以剛居柔者志在於遇以剛居剛
者无意遇之矣九三九五无意于求之遇故為次且
為含章九四上九志在於遇故凶吝隨之矣此初六
之辭所以兼言有攸往見凶者也

初六係于金柅貞吉有攸往見凶羸豕孚蹢躅象曰係
于金柅柔道牽也

初六巽也以陰居剛而在一卦之下應乎九四而遇於九二二爻皆乾也故曰係于金柅貞吉柅或作捰說者曰絡絲跌也青齊謂之柅以金為之取其堅重也巽為絲為繩直兌為金故有係于金柅之象治絲與繩者必以柅柅輕則搖動而絲棼柅重則端正而繩直初六之於九二是也五陽皆金而獨二為柅者謂其居下而得中承五金之聚也聚五金以為一柅其孰能動之哉聖人以初六之柔有牽係諸陽之漸

因其遇二也遂為之戒焉使之係于金柅柅不動豕
乎蹢躅初既與二為遇矣又進而有所往所見宜其
凶也自姤而往其卦為遯遯之初六亦曰勿用有攸
往是也或曰初配在四不使之從四而使之係二乎
曰此卦以遇為義蓋遇合之女未嘗擇配也二近而
先斯得之矣又使之求配而合焉則是與之長而其
遇不可勝窮也初苟舍二猶遇九三然則四之求之
亦已遠矣羸豕北豕也獸之淫者莫若豕而北為甚

馬左氏傳所謂婁豬是也孚孽尾也既孚而猶蹢躅淫躁之甚也初六既係於二而求過不已故有羸豕孚蹢躅之象馬制之於早則如金柅之不可移縱而弗圖則蹢躅而難制矣可不戒哉故子曰係于金柅柔道牽也或曰坎為豕而巽象之何哉曰初六之巽有攸往故曰巽往則為離離坎配也取諸牝豕不亦宜乎故曰有攸往見凶見者離也

九二包有魚无咎不利賓象曰包有魚義不及賓也

九二乾也以陽居柔而在下卦之中上无其應而遇
於初六之巽故包有魚包罩也罔罟之類也詩曰烝
然罩罩舊說以為包苴之包或以為庖厨之庖皆非
也初為巽三為兌故二有離象巽為魚離為罔罟以
二乘初有包罩之象雞豚狗彘人之所畜不可以言
遇也魚在川澤則有時而遇之矣故姤之民以魚為
喻猶屯之民以鹿為喻也五陽而求一陰是魚至少
而罔之者衆也二近而先斯得之矣故曰无咎不利

賓夫初於四為配而二取之宜若有咎矣然二之所
取者魚也非四之所得有也若取四之難豚狗彘得
為无咎乎哉二以四為賓賓外也為其无臣主之分
也若九五包魚而二取之得為无咎乎哉施罩以待
魚志于得耳過而不取以利於賓義之所不及也聖
人懼五陽之爭而一陰之長故使九二包魚而取之
初六係于柅而勿往則无女壯之漸矣遇而不取以
為九四之利則其遇也豈特四而已哉故子曰包有

魚義不及賓也君子之道斯為中庸矣

九三臀无膚其行次且厲无大咎象曰其行次且行未牽也

九三上體為乾下體為兌以陽居剛而在下卦之上上无其應而連于初六之巽故曰臀无膚其行次且三與初二同體二三皆陽而初為陰是三之臀无膚也三以純剛而與漸壯之陰同體非其志也是以其行次且也故曰厲无大咎陰消二則及三可謂厲矣

以其无意于遇知危而自警不與二爭民則可以无
大咎矣姤之九三即夬之九四也其為无膚而次且
則同也夬之九四牽羊則悔亡今反為姤而兌體猶
存是其未能牽之是以次且如故也故子曰其行次
且行未牽也

九四包无魚起凶象曰无魚之凶遠民也

九四上體為乾下體亦為乾以陽居柔而在上卦之
下應乎初六之巽故曰包无魚九四志於遇者也初

既與二遇矣四又隔于九三遠不相及是臨淵而羨
魚者也故曰起凶包而无魚則亦已矣何咎之有起
而爭之斯為凶矣或曰四失其配起而爭之何遽凶
乎曰姤者遇合之女未嘗擇配而從也夫既遇之而
我以為配是一民而二君矣又能保其不往也哉五
陽固志以決一陰猶不能決而反為姤矣四遠于初
二與之遇而四復爭之是衆君子内自相敵幾何而
不為小人之所乘哉此其所以凶也故子曰无魚之

凶遠民也魯昭公將去季民宋樂祁曰无民而能逞其志者未之有也靜以待民猶可動必憂昭公卒不克而出死于乾侯起凶之證也

九五以杞包瓜舍章有隕自天象曰九五舍章中正也有隕自天志不舍命也

九五乾也以陽居剛而在上卦之中遠无所應近无所遇而介於四上之間二爻皆乾也故曰以杞包瓜舍章有隕自天杞柳也告子所謂以杞柳為栝棬者

也。瓜木瓜也。詩所謂投我以木瓜者也。以杞包瓜，孔
子所謂繫而不食者也。剥之上九亦曰碩果不食，瓜
木果之碩者。予嘗詢之圃人，春華而夏實，霜降而後
熟，懼夫風雨虫獸之害，往往為春羽包裹繫于枝幹
之上，不然无孑遺矣。始一陰之長，至五為剥，百果草
木至此而皆剥矣。然而纍然碩果猶在其上，是必有
以包之者也。以杞云者，言其包絡之堅也。夫一陰雖
微，志在于剥，九二則與之比，既為所係矣。九三則與

之同體亦已危矣九四則與之為應將起而爭之矣
惟九五居中守正无意于遇不為初六小人之所染
汙則是全德而不刳舍章以有待也夫包瓜者必于一陰之時過此則懼其遂剥也舍章者必于一柔之世過此則六三將與之配懼其遂消也夫陰長而陽消百果草木至剥而皆隕者天之命也以杞包瓜而免于隕者人之志也包終堅完而不免于隕者亦天也未嘗包之與包之不堅則其勢必至於隕不可以

言天也若九五者包乎二剛之間遠无所應近无所
遇則其包之堅且完矣其有隕者可以歸之天矣故
子曰九五舍章中正也有隕自天志不舍命也包不
包人也隕不隕天也不舍吾志而已其如命何哉論
語作匏瓜匏瓜苦瓠也苦瓠人所不食故繫之以供
无舟而求濟者耳或曰以杞包瓜則何從而隕乎曰
飄風暴雨發屋拔木是豈包繫之所能禦哉若此者
可以言命矣故孟子有言知命者不立乎巖牆之下

或曰然則夫子之言曰吾豈匏瓜也哉焉能繫而不食何也曰夫子論逸民七人而曰我則異於是無可無不可孟子亦曰可以仕則仕可以止則止孔子也故夫舍章以待者時則有之矣而孔子不為也乃孔子則欲撥亂世而反之正者也其能如瓠瓜之不食乎故曰不曰堅乎磨而不磷不曰白乎涅而不緇是以南子不可見而見公山佛肸不可往而欲往也雖然善學柳下惠者莫若魯男子世之君子苟欲不磷

則如勿磨苟欲不緇則如勿涅苟欲不隕則不若包
繫之堅完也若此可謂善學孔子矣

上九姤其角吝无咎象曰姤其角上窮吝也

上九乾也以陽居柔而在一卦之上无應无過而乘
九五之乾故曰姤其角角上窮也一陰之長至於上
則為角上九志在於遇其所遇角矣初六兌之反故
有羊角之象焉乾為君子兌為小人兌之象為羊羊
陰狠而善觸者也故大壯與夬皆以牽羊喪羊為義

夫之初九將決上六往而不勝是以為姤今姤之上
九乃求遇焉小人之未得志也巽其辭色以媚君子
及其既得志也惟君子之務去則上九之遇初六也
豈復遇其柔巽也哉姤其角而已矣故曰吝无咎吝
羞也姤至上九君子之道窮矣窮而求遇其羞吝也
自取之矣又誰咎乎故子曰姤其角上窮吝也窮則
變矣變而為萃羊角在上不其然乎

周易經傳集解卷二十二